

**OBRTNIČKA KOMORA TUZLANSKOG KANTONA**

**S T A T U T**  
**OBRTNIČKE KOMORE TUZLANSKOG KANTONA**

**Tuzla, maj 2022. godine**

Na osnovu člana 56. Zakona o obrtu i srodnim djelatnostima ("Službene novine F BiH" broj: 75/21), Skupština Obrtničke komore Tuzlanskog kantona, radi usaglašavanja poslovanja sa odredbama Zakona o obrtu i usklađivanja sa Statutom Obrtničke komore FBiH, donosi:

## **S T A T U T**

### **OBRJNIČKE KOMORE TUZLANSKOG KANTONA**

#### **Član 1.**

##### **(Osnovne odredbe)**

Obrtnička komora Tuzlanskog kantona ( u daljem tekstu: "komora") je osnovana u cilju zastupanja svih obrtnika i lica koja obavljaju srodne djelatnosti na području tuzlanskog kantona.

#### **Član 2.**

##### **(Pravni status)**

Obrtnička komora Tuzlanskog kantona je samostalna, stručno-poslovna organizacija obrtnika i osoba koje obavljaju srodne djelatnosti koja je osnovana radi usklađivanja i zastupanja zajednički interesa članova komore, koji obavljaju djelatnost na području Tuzlanskog kantona ( u daljem tekstu: Kantona).

Komora zastupa i predstavlja obrtnike i osobe koje obavljaju srodne djelatnosti pred kantonalnim i drugim tijelima u zemlji i inozemstvu.

Obrtnička komora je pravno lice. Ona stiče svojstvo pravnog lica usvajanjem statuta i registracijom kod nadležnog suda.

#### **Član 3.**

##### **(Statut)**

Statut komore sadrži odredbe o:

- 1.) imenu i sjedištu i području komore;
- 2.) pečatu i žigu komore;
- 3.) broju članova obrtničke komore i broju predstavnika;
- 4.) raspodjeli broja članova i predstavnika na zastupljene djelatnosti na području obrtničke komore,
- 5.) izboru upravnih tijela i njihovim ovlaštenjima;
- 6.) sazivanju skupštine obrtničke komore i njenih tijela;
- 7.) formi rješenja i dokumentovanja odluka obrtničke komore i njenih tijela;
- 8.) izradi srednjoročnog finasijskog plana i njegovoj prezentaciji na skupštini; plana;
- 9.) predlaganju i odobravanju budžeta-proračuna;
- 10.) izradi, kontroli i prihvatanju završnog godišnjeg obračuna i prenošenju ovlasti za kontrolu toga obračuna na nezavisnu instituciju izvan komore;
- 11.) pretpostavkama i formi izmjene statuta;
- 12.) web stranici na kojoj se objavljuju saopštenja komore

#### **Član 4.**

##### **(Naziv, skraćeni naziv i sjedište)**

Naziv je: **Obrtnička komora Tuzlanskog kantona.**

Skraćeni naziv je: **OKTK.**

Sjedište Obrtničke komore kantona je u **Tuzli, u ulici Trg slobode bb.**

**Član 5.**  
**(Područje djelovanja)**

Obrtnička komora kantona djeluje na području općina: Banovići, Čelić, Dobož Istok, Gradačac, Gračanica, Kladanj, Kalesija, Lukavac, Sapna, Srebrenik, Teočak, Tuzla, Živinice.

**Član 6.**  
**(Djelatnosti)**

U unutarnjem prometu:

-94.11 Djelatnost poslovnih organizacija i udruženja poslodavaca.

**Član 7.**  
**(Pečati i štambilji)**

Obrtnička komora kantona ima svoj pečat i štambilj koji sadrže naziv i sjedište obrtničke komore ispisane latinicom.

Pečati komore su okruglog oblika prečnika 3 cm 1,5 cm sa tekstom po obodu: OBRTNIČKA KOMORA TUZLANSKOG KANTONA , a u sredini u jednom redu TUZLA.

Štambilj komore je pravougaonog oblika uobičajene veličine sa istim tekstom kao i pečat raspoređenim na način da se raspored slova prilagodi pravougaonom obliku štambilja.

Predsjednik Obrtničke komore kantona odlučuje o broju pečata i štambilja koji će se upotrebljavati za ovjeru tekućih akata i dokumenata. Ista odredba važi i za štambilje. Za pečate i štambilje se koristi plava boja.

**Član 8.**  
**(Znak i memorandum)**

Obrtnička komora kantona koristi znak Federalne obrtničke komore s tim da sa desne donje strane stoji skraćeni tekst naziva OK -TK.

Sa desne strane znaka stoji tekst: Obrtnička komora Tuzlanskog kantona ispisani velikim slovima.

Ispod teksta Obrtnička komora Tuzlanskog kantona ispisani su :adresa, brojevi telefona, faksa i mobitela, zatim broj transakcijskog računa, identifikacijski broj i šifra djelatnosti, web i e-mail adresa ispisani u crnoj boji.

Sve je to podvučeno linijom u crnoj boji i čini memorandum Obrtničke komore kantona. Veličina znaka i memorandumu Obrtničke komore kantona se prilagođava formatu papira na koji se utiskuje.

**Član 9.**  
**(Članstvo)**

Osnivači Obrtničke komore su obrtnici i lica koja obavljaju srodne djelatnosti na području kantona.

Članovi obrtničke komore kantona postaju obrtnici i lica koja obavljaju srodne djelatnosti sa područja kantona danom upisa u Obrtni registar.

Članovi Obrtničke komore kantona mogu postati trgovačka i privredna društva i druga pravna lica, osnovana po drugim zakonima.

Pravna i druga lica iz stava 3. Ovog člana potpisivanjem pristupnice postaju članovi Obrtničke komore kantona.

**Član 10.**  
**(Prava i obaveze članova)**

Članovi Obrtničke komore kantona imaju pravo:

- da biraju i budu birani u organe i tijela Obrtničke komore kantona;
- da budu redovito izvještavani o radu Obrtničke komore kantona;
- da upravljaju Obrtničkom komorom kantona putem izabranih predstavnika.

Članovi Obrtničke komore kantona imaju obaveze:

- da učestvuju u radu organa i tijela Obrtničke komore u koje su izabrani;
- da poštuju Statut i druga akta Obrtničke komore kantona;
- da redovno plaćaju članski doprinos propisan Zakonom o obrtu i srodnim djelatnostima;
- da obavljaju i druge poslove i zadatke u skladu sa Zakonom i ovim Statutom.

**Član 11.**  
**(Broj članova)**

Obrtnička komora kantona ima varijabilan broj članova zavisno od broja registriranih obrtnika i lica koja obavljaju srodne djelatnosti i drugih lica koja se učlane u Obrtničku komoru kantona prema članu 84. stav 4. Zakona o obrtu i srodnim djelatnostima, a obavljaju djelatnost na području kantona.

**Član 12.**  
**(Broj predstavnika)**

U Skupštinu Obrtničke komore kantona bira se 39 predstavnika (delegata) i 78 zamjenika predstavnika (delegata).

**Član 13.**  
**(Raspodjela mandata)**

Broj predstavnika koji se bira u Skupštinu utvrđuje se po osnovu broja registrovanih obrtnika i lica koja obavljaju srodnu djelatnost na području Obrtničke komore kantona vodeći računa o sljedećem:

**- teritorijalna zastupljenost**

Sa područja svake općine mora biti najmanje jedan predstavnik obrtnika ili lica koja obavljaju srodno zanimanje i dvostruki broj zamjenika u Skupštini Obrtničke komore kantona.

Prema podacima iz registra Obrtničke komore kantona teritorijalno općinama pripada broj delegata i to kako slijedi:

1. Izborna jedinica Banovići dva člana + četiri zamjenska
2. Izborna jedinica Doboj Istok dva člana + četiri zamjenska
3. Izborna jedinica Gračanica šest članova + dvanaest zamjenskih
4. Izborna jedinica Gradačac četiri člana + osam zamjenskih
5. Izborna jedinica Kalesija dva člana + četiri zamjenska
6. Izborna jedinica Kladanj jedan član + dva zamjenska
7. Izborna jedinica Čelić jednog člana + dva zamjenska
8. Izborna jedinica Srebrenik tri člana + šest zamjenskih

9. Izborna jedinica Lukavac četiri člana + osam zamjenskih
10. Izborna jedinica Tuzla šest članova + dvanaest zamjenskih
11. Izborna jedinica Teočak jednog člana + dva zamjenska
12. Izborna jedinica Sapna jednog člana + dva zamjenska
13. Izborna jedinica Živinice šest članova + dvanaest zamjenskih

#### **- zastupljenost prema djelatnostima i ravnopravnosti spolova**

Zastupljenost prema djelatnostima se utvrđuje na osnovu broja registriranih obrtnika i lica koja obavljaju srodnu djelatnost na području Obrtničke komore kantona. Pri raspodjeli se mora voditi računa o privrednim specifičnostima i privrednom značaju pojedinih djelatnosti. Prilikom formiranja Skupštine Obrtničke komore kantona, Upravnog i Nadzornog odbora i drugih organa i tijela odlučivanja i komisija, članstvo u organima, tijelima i komisijama odražavaće ravnopravnu zastupljenost po nacionalnoj strukturi kantona te spolova u najmanjem omjeru 30% žena.

### **Član 14.**

#### ***(Ciljevi Obrtničke komore kantona)***

Ciljevi Obrtničke komore kantona su da:

- unapređuje obrt i srodne djelatnosti
- podupire interese članova Obrtničke komore kantona i brine se o pravednom izjednačavanju njihovih interesa i interesa njihovih udruženja sa ostalim segmentima društva;
- zastupa interese svojih članova pred tijelima kantonalne i državne uprave prilikom donošenja propisa od interesa za svoje članove;
- daje primjedbe i prijedloge tijelima kantonalne vlasti i tijelima kantonalne državne uprave pri donošenju propisa od interesa za svoje članove;
- obavlja poslove iz područja obrazovanja i osposobljavanja za potrebe obrtništva propisane Zakonom;
- osniva Sud časti;
- osniva Arbitražno vijeće;
- osniva glasilo Obrtničke komore kantona;
- vodi evidenciju članova Obrtničke komore kantona;
- vodi evidenciju udruženja na svom području;
- podstiče udruživanje u smislu člana 64., 82., i 83. Zakona o obrtu i srodnim djelatnostima ("Službene novine F BiH" broj: 35/09 i 42/11), koordinira, pomaže i prati provođenje osnovnih programskih zadataka u udruženjima;
- podstiče, razvija i štiti dobre poslovne običaje, poslovni moral;
- pruža pomoć svojim članovima prilikom osnivanja i u toku obavljanja djelatnosti;
- izdaje potvrde o porijeklu proizvoda izrađenih u pogonima svojih članova i druge potvrde koje služe privrednom prometu, ako za te poslove nisu zadužene neke druge zakonom propisane ustanove;
- inicira i osniva tehnološke parkove, inkubatore i zanatske centare;
- osniva fond uzajamne pomoći
- inicira razvojne projekte u ostvarenju novih obrtničkih radnji i pogona;
- pruža savjete za pravna, knjigovodstvena i druga pitanja članovima Obrtničke komore kantona;
- organizuje izložbe, sajmove i prezentacije za promociju proizvoda i usluga članova Obrtničke komore kantona;
- predstavlja članove Obrtničke komore kantona na sajmovima u zemlji i inostranstvu;

- ostvaruje saradnju sa odgovarajućim obrtničkim komorama i udruženjima gradova, pokrajina, regija u drugim državama;
- surađuje sa finansijskim institucijama, osiguravajućim društvima i privrednim društvima u cilju promocije i zaštite prava članova Obrtničke komore kantona;
- obavlja i druge poslove vezane za provođenje odredbi Statuta.

#### **Član 15. (Organi upravljanja)**

Organi upravljanja u komori su:

- Skupština,
- upravni i nadzorni odbor (u daljem tekstu:Upravna tijela)
- predsjednik i potpredsjednici Obrtničke komore TK

#### **Član 16.**

***(Izborni postupak za predsjednika i potpredsjednike Obrtničke komore kantona)***  
Obrtnička komora kantona ima predsjednika i dva potpredsjednika.

Skupština iz reda svojih članova bira predsjednika i potpredsjednike Obrtničke komore kantona tajnim glasanjem na prijedlog komisije za izbor i imenovanje. Mandat predsjednika i potpredsjednika traje četiri godine. Nakon zbrajanja rezultata glasanja kandidat koji dobije najveći broj glasova je izabran za predsjednika, a ostala dva kandidata za potpredsjednike Obrtničke komore kantona.

U slučaju da dva kandidata dobiju isti broj glasova, održava se drugi krug glasanja za ta dva kandidata i kandidat koji dobije veći broj glasova je izabran za predsjednika, a kandidat sa manjim brojem glasova je potpredsjednik.

Predsjednik i potpredsjednici Obrtničke komore kantona u pravilu moraju biti iz reda tri konstitutivna naroda ili ostalih, te funkciju mogu obavljati u najviše dva mandata. Predsjednik i potpredsjednici Obrtničke komore kantona svoju funkciju vrše u međusobnoj koordinaciji. Predsjednik obrtničke komore kantona predstavlja i zastupa obrtničku komoru kantona i po pravilu volonter.

Izuzetno za vrijeme trajanje svog mandata predsjednik obrtničke komore kantona može biti angažovan na profesionalni rad u Obrtničku komoru kantona, na njegov zahtjev, a po odluci Skupštine.

#### **Član 17.**

***(Izborni postupak za sekretara Obrtničke komore kantona)***

Obrtnička komora kantona ima sekretara.

Sekretara imenuje Skupština Obrtničke komore kantona na prijedlog komisije za izbor i imenovanje i sa njim se sklapa ugovor o radu.

#### **Član 18.**

***(Sazivanje sjednica Skupštine Obrtničke komore kantona)***

Skupština obrtničke komore kantona zakazuje se po potrebi, a najmanje jednom godišnje.

Sjednicu Skupštine saziva Upravni odbor. Sjednicom Skupštine predsjedava predsjednik Skupštine, a u njegovoj odsutnosti potpredsjednik Skupštine. U odsutnosti predsjednika i potpredsjednika, Skupštinom predsjedava član Skupštine kojeg izabere Skupština. Sjednica Skupštine mora se sazvati na zahtjev Nadzornog odbora ili najmanje 1/3 članova Skupštine.

Podnositelj zahtjeva dužan je svoj zahtjev za sazivanje Skupštine pismeno obrazložiti.

### **Član 19.**

#### ***(Rad Skupštine i odlučivanje)***

Skupština može raditi i punovažno odlučivati ako sjednici prisustvuje natpolovična većina njenih članova.

Za odlučivanje o Statutu, njegovim izmjenama i dopunama, potrebno je da glasa najmanje 2/3 od ukupnog broja prisutnih članova u Skupštini.

Ostale odluke Skupština donosi većinom glasova prisutnih članova Skupštine. Članovi Skupštine nemaju pravo prilikom zasjedanja i donošenja odluka uzeti učešća ako je ta odluka vezana za njihove lične interese.

Pravo glasa u Skupštini Obrtničke komore kantona imaju izabrani predstavnici.

Sjednice Skupštine su javne, ali predsjednik Skupštine može odlučiti da sjednice mogu biti zatvorene za javnost i nakon održane sjednice izdati saopćenje za javnost.

### **Član 20.**

#### ***(Zadaci Skupštine)***

Skupština je najviši organ Obrtničke komore kantona i obavezna je da:

- donosi Statut;
- donosi Poslovnik o radu skupštine;
- bira upravna tijela i komisije;
- utvrđuje budžet uključujući plan raspodjele, odobrava izdatke koji nisu predviđeni budžetom, daje ovlaštenja za podizanje kredita i stvarnim opterećenjima nepokretne imovine;
- predlaže iznos članarine čiju visinu utvrđuje Obrtnička komora F BiH;
- donosi propise o raspolaganju budžetom, kasom i računom;
- kontrolira i prihvata završni godišnji račun i odlučuje koja nezavisna institucija treba izvršiti kontrolu završnog godišnjeg računa;
- donosi odluku o sticanju i prodaji nepokretne imovine;
- donosi propise o stručnom obrazovanju, stručnom usavršavanju u obrazovanju i prekvalifikaciji u skladu sa Zakonom;
- donosi godišnji program rada i financijski plan;
- usvaja izvještaje o radu svih organa i tijela Obrtničke komore kantona;
- usvaja srednjoročni i dugoročni financijski plan;
- bira i razrješava ostale organe Obrtničke komore kantona u skladu sa Statutom i Zakonom;
- imenuje komisiju za izbor i imenovanje;
- bira predstavnike u Skupštinu Obrtničke komore FBiH;
- imenuje i razrješava Predsjednika Obrtničke komore kantona;
- imenuje i razrješava sekretara Obrtničke komore kantona;
- donosi druge odluke, pravilnike, zaključke i preporuke utvrđene Statutom i Zakonom;
- donosi odluku o izmjenama Statuta komore;

Odluke donesene u skladu sa stavom 1.) alineja 3.); 5.); 6.); 7.) i 18.) objavljuje se na web stranici Obrtničke komore kantona.

### **Član 21.**

#### ***(Izborni postupak u Skupštinu Obrtničke komore kantona)***

Izborni postupak provodi se prema Pravilniku o izbornoj proceduri u obrtničkim komorama kantona i Obrtničkoj komori Federacije BiH, koji donosi Ministarstvo razvoja poduzetništva i obrta FBiH.

#### **Član 22.**

##### ***(Zadaci predsjednika Skupštine)***

Predsjednik Skupštine Obrtničke komore kantona predsjedava sjednicama Skupštine, potpisuje akta koja Skupština donese, koordinira rad sa potpredsjednicima Skupštine i odgovoran je za rad Skupštine.

Predsjednik Skupštine potpisuje akta koje donese Skupština.

#### **Član 23.**

##### ***(Zadaci predsjednika Obrtničke komore kantona)***

Predsjednik Obrtničke komore kantona je birana osoba sa posebnim ovlaštenjima i ima sljedeće zadatke:

- zastupa i predstavlja Obrtničku komoru kantona pred organima vlasti i svim drugim privrednim i neprivrednim subjektima neograničeno;
- organizuje poslovanje u Obrtničkoj komori kantona;
- priprema prijedloge svih akata za Upravni odbor;
- izvršava odluke i zaključke Skupštine i upravnog odbora te poduzima određene mjere za njihovu realizaciju;
- Upravnom odboru predlaže unutarnju organizaciju i sistematizaciju;
- odgovara za zakonitost rada Obrtničke komore kantona, njenih organa i stručne službe;
- potpisuje interna i eksterna akta za koje Statutom nije ovlašteno drugo lice;
- predsjedava sjednicama Upravnog odbora
- obavlja i druge poslove u skladu sa Statutom i Zakonom.

#### **Član 24.**

##### ***(Prenos ovlaštenja predsjednika)***

U odsutnosti ili spriječenosti za rad predsjednika, jedan od potpredsjednika zamjenjuje predsjednika kojeg on ovlasti u slučaju trajne spriječenosti obavljanja funkcije predsjednika, isti dužnost predsjednika obavlja do prve sjednice Skupštine Obrtničke komore kantona.

Predsjednik po potrebi može ovlastiti i drugo lice za zastupanje i potpisivanje.

#### **Član 25.**

##### ***(Zadaci sekretara Obrtničke komore kantona)***

Sekretar Obrtničke komore kantona je imenovano lice sa statusom zaposlenog radnika Obrtničke komore kantona.

Sekretar komore pored općih uslova mora da ima visoku školsku spremu pravnog smjera.

Poslovi i radni zadaci sekretara obuhvataju:

- administrativne poslove vezane za organe i tijela komore;
- pravne poslove vezane za organe i tijela i zakonitost rada;
- priprema sjednice Skupštine i sjednice organa i tijela komore;
- vođenje zapisnika na svim sjednicama;
- prijem elektronske i druge pošte;
- slanje elektronske i druge pošte;
- vođenje knjige protokola;
- vođenje KUF i KIF;
- koordinacija svih aktivnosti zaposlenika u Obrtničkoj komori;



- službene evidencije, evidencija prisustva radnika na poslu;
- nadziranje ažurnosti i zakonitosti rada organa i tijela kao i zaposlenih radnika;
- rukovodi radom stručne službe Obrtničke komore kantona.

Dio poslova i radnih zadataka sekretar može prenositi na duge zaposlenike u Obrtničkoj komori kantona.

Sekretar je obavezan da prisustvuje sjednicama Skupštine, Upravnog odbora i Nadzornog odbora, te izvještava o radu stručnih službi ove organe.

### **Član 26.** **(Upravna tijela)**

Upravna tijela Obrtničke komore kantona su:

- Skupština
- Upravni odbor
- Nadzorni odbor
- Predsjednik Obrtničke komore TK
- Potpredsjednici Obrtničke komore TK

### **Član 27.** **(Izbor upravnih tijela)**

Upravna tijela Obrtničke komore kantona, tajnim glasanjem bira Skupština Obrtničke komore kantona putem glasačkih listića na period od četiri (4) godine, odnosno na mandat trajanja mandata Skupštine. Izbor aklamacijom se može vršiti ako niko nije uložio prigovor na takav način izbora. Rezultati izbora za upravna tijela Obrtničke komore kantona moraju se objaviti u toku trajanja sjednice Skupštine.

Skupština Obrtničke komore kantona imenovanje upravnih tijela svakog trenutka može opozvati. Opoziv je dopušten samo u slučajevima grube povrede preuzetih obaveza i nesposobnost.

### **Član 28.** **(Ovlaštenja upravnih tijela)**

#### **Upravni odbor**

- provodi odluke i zaključke Skupštine;
- priprema sjednice Skupštine i utvrđuje prijedlog Statuta i drugih akata koje donosi Skupština;
- predlaže odluke i stajališta, te daje mišljenje o pitanjima o kojima raspravlja Skupština;
- odlučuje o prigovorima na pojedinačne akte donesene u obavljanju javnih ovlasti;
- predlaže način provedbe stručne izobrazbe u obrtništvu;
- daje mišljenja o propisima koje predlažu i donose nadležna tijela kantonalne vlasti i tijela kantonalne državne uprave iz oblasti obrtništva;
- predlaže nadležnim kantonalnim tijelima državne vlasti i kantonalnim tijelima državne uprave donošenje Zakona, podzakonskih propisa i drugih akata;
- donosi opće akte potrebne za rad Komore, koji nisu u nadležnosti Skupštine;
- određuje visinu naknada za usluge koje obavlja Komora, te troškova Suda časti i Izbranog sudišta (Abitraže);
- donosi odluku o osnivanju stručne službe;
- donosi odluku o osnivanju tehnoloških parkova, inkubatora i zanatskih centara;
- odlučuje o prigovorima na pojedinačne akte donesene u obavljanju javnih ovlasti;
- odlučuje o prijemu u dobrovoljno članstvo Komore;

- donosi Pravilnik o priznanjima Komore;
- donosi Pravilnik o nastupu na sajmovima u organizaciji Komore;
- donosi Odluku o visini naknade, nagrade, dnevnica i putnih troškova za tijela Komore;
- donosi Poslovnik o radu Upravnog odbora;
- imenuje koordinatora izbora prema Pravilniku o izbornoj proceduri u obrtničkim komorama kantona i Obrtničkoj komori FBiH;
- imenuje izbornu komisiju-povjerenstvo prema Pravilniku o izbornoj proceduri u obrtničkim komorama kantona i Obrtničkoj komori FBiH;
- po potrebi osniva radna tijela Upravnog odbora;
- daje saglasnost na statut udruženja obrtnika koja se osnivaju na području djelovanja obrtničke komore kantona;
- rješava i ostala pitanja koja prema ovom Statutu, Zakonu ili drugim propisima spadaju u njegov djelokrug.

### **Nadzorni odbor**

- nadzire provođenje Statuta i drugih općih akata Obrtničke komore kantona;
- nadzire materijalno-financijsko poslovanje i raspolaganje sredstvima;
- donosi Poslovnik o radu Nadzornog odbora;
- obavlja i druge poslove predviđene Statutom.

### **Član 29.**

#### ***(Biranje Upravnog odbora Obrtničke komore kantona)***

Upravni odbor Obrtničke komore kantona bira Skupština na svom zasjedanju i to: iz svojih redova sedam članova, a jednog člana imenuje ministarstvo privrede TK.

na zahtjev Skupštine. Predsjednik komore i dva dopredsjednika su članovi upravnog odbora obrtničke komore kantona.

Mandat Upravnog odbora traje koliko i mandat Skupštine Obrtničke komore kantona.

Upravni odbor obavlja svoju funkciju i po isteku mandata Skupštine koja ga je izabrala, sve dok novoizabrana Skupština ne izabere novi Upravni odbor.

Upravni odbor ima 11 članova.

Predsjednik komore je ujedno i predsjednik Upravnog odbora.

### **Član 30.**

#### ***(Održavanje sjednica Upravnog odbora)***

Upravni odbor radi u sjednicama koje se zakazuju po potrebi a najmanje jednom u tri mjeseca.

Upravni odbor zakazuje i njime predsjedava predsjednik Upravnog odbora, a u njegovom odsustvu jedan od podpredsjednika Obrtničke komore Tuzlanskog kantona.

Upravni odbor se može zakazati na inicijativu 1/3 njegovih članova, predsjednika Skupštine, predsjednika Obrtničke komore kantona, predsjednika Nadzornog odbora i predsjednika Suda časti.

Članovi Upravnog odbora nemaju pravo učešća u odlučivanju ukoliko se donosi odluka vezana za njihove lične interese.

U slučaju hitnosti pismenim putem mogu se obavijestiti članovi Upravnog odbora o odluci koju treba donijeti i ukoliko se ista pismeno ne ospori smatra se usvojenom.

Na sjednici se vodi knjiga zapisnika, a po mogućnosti i tonski zapis.

Sjednicama upravnog odbora prisustvuju pored članova i predsjednik Obrtničke komore kantona i predsjednik Nadzornog odbora bez prava odlučivanja.

Upravni odbor pravovaljano odlučuje ako je sjednici prisutno više od polovice njegovih članova. Upravni odbor donosi odluke većinom glasova prisutnih članova. Za svoj rad Upravni odbor odgovara Skupštini.

Akte koje donosi Upravni odbor potpisuje predsjednik Upravnog odbora.

### **Član 31.**

#### ***(Biranje Nadzornog odbora Obrtničke komore kantona)***

Nadzorni odbor Obrtničke komore kantona ima pet članova od kojih je jedan Predsjednik i četiri člana koje bira i razrješava Skupština obrtničke komore, na prijedlog komisije za izbor i imenovanje, u trajanju svog mandata, tajnim glasanjem.

Nakon zbrajanja rezultata glasanja, kandidat koji dobije najveći broj glasova je izabran za predsjednika Nadzornog odbora, a ostala 4 za članove Nadzornog odbora.

Članovi Upravnog odbora ne mogu biti birani u Nadzorni odbor, s tim što je predsjednik Nadzornog odbora dužan da prisustvuje sjednicama Upravnog odbora ili ovlasti jednog od članova Nadzornog odbora.

### **Član 32.**

#### ***(Održavanje sjednica Nadzornog odbora)***

Nadzorni odbor radi u sjednicama koje saziva predsjednik Nadzornog odbora po potrebi, a najmanje tri puta godišnje.

Sjednica Nadzornog odbora se može sazvati u slučajevima da se primijeti kršenje Statuta ili nekih drugih akata Obrtničke komore kantona, odnosno po uočavanju nezakonitih radnji od strane pojedinaca, organa i tijela obrtničke komore.

Predsjednik Nadzornog odbora potpisuje akta koje donosi ovo tijelo.

### **Član 33.**

#### ***(Zadaci Nadzornog odbora)***

Nadzorni odbor je kontrolno tijelo imenovano od strane Skupštine Obrtničke komore kantona sa zadacima:

- sprovođenje odredbi Statuta i drugih akata Obrtničke komore kantona;
- nadzor nad ostvarivanju prava članova Obrtničke komore kantona;
- nadzor nad materijalno-financijskom poslovanju Obrtničke komore kantona;
- nadzor nad zakonitosti rada svih organa, tijela i pojedinaca u Obrtničkoj komori kantona.

Nadzorni odbor o svom radu podnosi izvještaj Skupštini Obrtničke komore kantona najmanje jednom godišnje.

### **Član 34.**

#### ***(Kordinator izbora i izborna komisija)***

Kordinator izbora i Izborna komisija je povremeno tijelo koje imenuje Upravni odbor i oni čine Izbornu komisiju, kojom predsjedava kordinator izbora, koji su nadležni za izbore prema Pravilniku o izbornoj proceduri u obrtničkim komorama kantona i Obrtničkoj komori FBiH.

### **Član 35.**

**(Verifikaciona komisija)**

Verifikaciona komisija je povremeno tijelo Skupštine koja se imenuje na mandat dok traje zasjedanje Skupštine.

**Član 36.**  
**(Stručna služba Obrtničke komore kantona)**

Obrtnička komora kantona ima stručnu službu za obavljanje stručnih, administrativnih, pomoćnih i drugih poslova za rad Obrtničke komore kantona i drugih oblika rada i djelovanja u komori, u skladu sa funkcijama i zadacima obrtničke komore i njenih organa.

**Član 37.**  
**(Sud časti)**

U okviru Obrtničke komore kantona djeluje Sud časti :

Sud časti se stara o razvijanju i zaštiti dobrih poslovnih običaja od strane članova Obrtničke komore kantona, vodi postupak i izriče mjere za povredu dobrih poslovnih običaja, ugovora, trgovačkih pravila i drugih propisa na domaćem tržištu.

Sud časti naročito razmatra i sankcioniše narušavanje konkurencije na tržištu putem monopolističkih djelovanja i nelojalne konkurencije, špekulacije i ograničavanje tržišta te povredu ugleda svojih članova.

Svako pravno i fizičko lice može pokrenuti spor kod Suda časti Obrtničke komore kantona ukoliko je oštećen po bilo kom osnovu od strane člana Obrtničke komore kantona. Član Obrtničke komore kantona može tražiti arbitražu suda časti u slučajevima povrede njegovih prava od članova Obrtničke komore kantona ili drugih lica.

U slučaju neuspjeha Suda časti u rješavanju uloženog spora, postupak se nastavlja na redovnom nadležnom sudu.

Upravni odbor obrtničke komore kantona posebnim opštim aktom utvrđuje organizaciju nadležnosti i sastav Suda časti, broj i način izbora sudija i tužilaca Suda časti, mjere koje se mogu izreći, postupak i druga pitanja od značaja za rad Suda časti.

**Član 38.**  
**(Akti Obrtničke komore kantona)**

U ostvarivanju ciljeva organi i tijela Obrtnička komora kantona donosi: Statut, odluke, zaključke, preporuke, pravilnike i poslovnik.

**Član 39.**  
**(Forma nacrtu Statuta)**

Nacrt i prijedlog Statuta utvrđuje upravni odbor, a donosi ga skupština Obrtničke komore kantona.

Statutom Obrtničke komore kantona naročito se regulišu: ciljevi i zadaci Obrtničke komore, organi i tijela, prava i dužnosti članova, saradnja Obrtničke komore sa drugim organima i organizacijama, informisanje članova i javnost rada Obrtničke komore kantona, način finansiranja i druga pitanja od značaja za rad obrtničke komore propisana Zakonom.

**Član 40.**  
**(Odluke)**

Odlukom se uređuju statutarna pitanja i druga pitanja u okviru prava i ovlaštenja Obrtničke komore kantona, a u skladu sa zakonom i ovim statutom, mijenja se i dopunjuje statut,

odlučuje o zaključivanju ugovora i sporazuma i predlaže osnovica i stopa članskog doprinosa po kojoj članovi plaćaju Obrtničkoj komori kantona.

Odluka organa Obrtničke komore kantona ima obavezujuću snagu za članove, a članovi Obrtničke komore su međusobno odgovorni za sprovođenje odluka organa Obrtničke komore kantona.

**Član 41.**  
**(Zaključci)**

Zaključkom se izražavaju stav, mišljenje i prijedlog organa Obrtničke komore kantona i konstituisanje organa i tijela Obrtničke komore kantona.

**Član 42.**  
**(Stavovi)**

Delegat u Skupštini, Skupština, svako tijelo i organ u Obrtničkoj komori kantona ima pravo na svoj stav. Stavovi se u pisanom obliku razmatraju, te ako se prihvate od tijela na kojima se razmatraju po njima se postupa po proceduri propisanoj Poslovníkom o radu Skupštine Obrtničke komore kantona.

Pojedinac ima pravo tražiti da se njegov stav izdvoji u zapisniku.

**Član 43.**  
**(Preporuke)**

Preporukom se smatra pisani akt kojim se preporučuje poduzimanje radnji za poboljšanje organizacionog i funkcionalnog ambijenta pojedinca, tijela i općeg ambijenta.

**Član 44.**  
**(Poslovník)**

Skupština Obrtničke komore kantona donosi Poslovník o radu Skupštine.

Poslovníkom o radu pobliže se propisuju radnje i aktivnosti propisane Statutom i Zakonom i to:

1. Opšte odredbe
2. Prava idužnosti članova u skupštini Obrtničke komore,
3. Plan i program rada skupštine
4. Pripremanje sjednica
5. Tok sjednica
6. Održavanje reda na sjednicama
7. Zapisnik sa sjednice
8. Verifikacija mandata
9. Izbor i imenovanja
10. Završne odredbe

**Član 45.**  
**(Finansiranje)**

Sredstva za rad Obrtničke komore kantona obezbjeđuju se iz članarine, kotizacija, prihoda iz imovine, naknade za usluge, poklonima i donacijama članova i drugih izvora u skladu sa Zakonom, Statutom i drugim aktima Obrtničke komore kantona.

**Član 46.**  
**(Finansijski plan)**

Na prijedlog Upravnog odbora Skupština Obrtničke komore kantona donosi finasijski plan za svaku kalendarsku godinu prije početka te godine za koju se donosi.

**Član 47.**  
**(Godišnji izvještaj i završni račun)**

Godišnji izvještaj o ostvarenim prihodima i rashodima te završni račun usvaja Skupština Obrtničke komore kantona na prijedlog upravnog odbora, a u skladu sa Statutom i zakonskim propisima.

Ukoliko Skupština Obrtničke komore kantona do kraja kalendarske godine ne donese finasijski plan za narednu godinu upravni odbor donosi odluku o privremenom financiranju Obrtničke komore za period od tri mjeseca s tim da prihodi i rashodi ne mogu biti veći od zadnjeg tromjesečja predhodne godine.

**Član 48**  
**(Obeštećenje trećih lica)**

Obrtnička komora kantona je odgovorna, propisanim postupkom, obeštetiti treća lica, za štetu koju počine upravna tijela, članovi upravnih tijela ili neki drugi, u skladu sa Statutom, imenovani zastupnici, u obavljanju povjerenih im funkcija.

**Član 49.**  
**(Javnost rada)**

Rad Obrtničke komore kantona je javan i o radu organa i tijela obavještavaju se članovi i šira javnost putem vlastitih novina sredstava informisanja i na drugi uobičajeni način. Organi Obrtničke komore kantona mogu odlučiti da određena pitanja, izuzetno razmatraju bez predstavnika sredstava informisanja.

Podatke i informacije o radu Obrtničke komore kantona mogu dati samo ovlaštena lica, Predsjednik ili lice koje on ovlasti.

Obrtnička komora kantona Odlukom Upravnog odbora osniva novine u kojima se određuju osnovna načela, koncepcija i sadržaj glasila.

**Član 50.**  
**(Akti koji se objavljuju na web stranici Obrtničke komore TK)**

Pored akata navedenih u članu 89. stav 2 Zakona o obrtu i srodnim djelatnostima, Obrtnička komora kantona objavljuje Statut o broju članova i broju predstavnika u komori, odluku o izboru upravnih tijela i njihovim ovlašćenjima i druga akata kada to odluče organi koji ih donose.

Akti iz prethodnog stava objavljuju se na web stranici Obrtničke komore TK.

**Član 51.**  
**(Tumačenje)**

Za tumačenje ovog statuta ovlaštena je Skupština komore.

**Član 52.**  
**(Stupanje na snagu)**

Saglasnost na ovaj Statut daje Obrtnička komora Federacije BiH. Statut se objavljuje na službenoj internet stranici kantonalne komore.

**Član 53.**  
**(Izmjene i dopune)**

Izmjene i dopune ovog Statuta vrše se na način i po postupku za njegovo donošenje.

**Član 54.**  
**(Prestanak primjene)**

Danom stupanja na snagu ovog Statuta prestaje primjena ranijeg Statuta od februara 2018.godine.

**Tuzla, 07.05.2022. godine**  
**Broj :391/22**

**Predsjednik Skupštine**